

Genocid nad Bošnjacima, Srebrenica 1995-2020: Uzroci, razmjere i posljedice (Zbornik radova)

Međunarodna naučna konferencija pod nazivom „Genocid nad Bošnjacima, Srebrenica 1995-2020“, je održana 19. oktobra 2020. godine u Sarajevu. Godinu dana kasnije u saradnji Institut za istraživanje zločina protiv čovječnosti i međunarodnog prava Univerziteta u Sarajevu, Univerzitet u Sarajevu, Univerzitet u Tuzli i Institut za historiju Univerziteta u Sarajevu su izdali zbornik radova sa ove Međunarodne naučne konferencije pod nazivom: *Genocid nad Bošnjacima, Srebrenica 1995-2020: Uzroci, razmjere i posljedice*. Zbornik radova sastoji se od dva toma, te predstavlja do sada najveći skup radova vezanih za događanja u Srebrenici i Bosni i Hercegovini 1995. godine.

Međutim, uprkos tome što su u naslovu naznačeni uzroci, razmjere i posljedice, u radovima koji se nalaze u ovom zborniku je moguće pronaći mnogo više historijskih konstanti. Shodno tome, unutar dva toma ovog zbornika, radovi su podijeljeni u šest zasebnih cijelina, a to su: 1. Uvodne rasprave o genocidu nad Bošnjacima, 2. Međunarodnopravne analize, 3. Historijske analize događaja i zločina 1992-1995., 4. Revizionizam i negiranje genocida, 5. Društveno-političke posljedice genocida i 6. Metodološke rasprave, osvrti i prikazi.

S obzirom na glavnu temu unutar ovog zbornika radova, a to je genocid u Srebrenici za pretpostaviti je da će isti naći na velik odziv javnosti i privući pažnju. Srebrenica je živa rana Bošnjaka, koja nikada u potpunosti neće zacijeliti. Genocid u Srebrenici nije isključivo samo pravna terminologija ili pravni izraz kojem se daje na značaju zarad nacionalnog moralnog uzdizanja Bošnjaka, već je genocid u Srebrenici historijska činjenica i događaj koji jedino tako se mora proučavati kroz naredne decenije unutar moderne historije. Važan dio genocida u Srebrenici predstavlja i njegovo negiranje, pokušaj relativizacije i pokušaj govora o različitim percepcijama. Nacionalni naboji oko Srebrenice su i u 2022. godini prisutni, te shodno tome na posljednjim lokalnim izborima u Srebrenici nisu birani gradonačelnici zbog njihovih privrednih planova, već su birani isključivo po nacionalnoj pripadnosti zarad prebrojavanja krvnih zrnaca.

Događaji u Srebrenici još uvijek predstavljaju najveći zločin nakon Drugog svjetskog rata, te zapravo dokazuju da prava pobjeda nad fašizmom još uvijek nije postignuta. Ljudsko dostojanstvo nalaže priznavanje genocida nad Bošnjacima, dok sa druge strane upravo oni koji su ga počinili su najveći negatori genocida na svim poljima. Ne postoji nikakav izgovor za

bilo koji zločin, pa isto tako ne može postojati izgovor za genocid u Srebrenici, ali isto kao i svaki drugi događaj u historiji i on je imao svoje uzroke, svoje razmjere i svoje posljedice koje se osjećaju i dan danas.

Muhamed Bogilović